

# Plain optimissem en il futur

Partida burgais-democratica dal Grischun

DA GION NUTEGN STGIER / FMR

■ **Il davos pled pertutgant l'avegnir da la partida hajan en in mais ils comembers. Quai ha ditg Benno Niggli, il president da la pbd da noss chantun. Propostas per in bun avegnir da la partida derivan da la pbd giuvna.** A l'apero da Bumaun da la Partida burgais-democratica dal Grischun (pbd) eran preschents *Benno Niggli*, il president, *Gian Michael*, il schef da fracziun e lura er cusseglier guvernativ *Jon Domenic Parolini*. Malgrà la situaziun malengraziavla da la pbd cun avair gè in davos onn cun intginas terradas politicas eran Niggli, Michael e Parolini da buna luna. Tuts trais umens guardan lura er cun plain optimissem en l'avegnir da lur partida. Els èn er da buna speranza che la pbd grischuna haja la qualidad ed il potenzial da superar quella sfida suenter il davos onn plitost turbulent.

## In bun cusseglier naziunal

Da perder ses mandant en il cussegl naziunal cun manchentar *Duri Campell* la reelecziun tar las elecziuns federalas saja bain stà in vair culp per la pbd grischuna, ha punctuà Niggli. Campell haja fatg ils davos quatter onns a Berna politica seriusa, reala e credibla ed avessia merità ina reelecziun. Da vegnir tar las proximas elecziuns naziunalas danovamain tar in post en la chombra gronda dal parlament svizzer saja strusch pussaivel per la pbd grischuna, ha ditg Niggli. La raschun saja er ch'il Grischun perdia probabel da tschintg sezs en il cussegl naziunal in sez al chantun Turiutg pervia da la sminuziun da la populaziun. La perdita dal sez da Campell, quella haja fatg fitg mal, da perder en il parlament federal il dumber da fracziun, quella realitad saja anc blier pi pauc chapibla e nauscha, ha ditg Niggli.



Da buna speranza d'avair in meglier avegnir: Gian Michael, schef da fracziun, Benno Niggli, president da partida e Jon Domenic Parolini, cusseglier guvernativ (da san.).

FOTO G. N. STGIER

El è però persvas che cuminaivel vegnia la pbd svizra e grischuna da survenstcher quellas sconfittas, ha menziunà il president e deputà da la pbd da noss chantun.

## Ursin Widmer sco «motor»

Suenter las elecziuns naziunalas 2019 haja ina gruppa da la pbd giuvna cun

*Ursin Widmer* sco «motor» analisà las elecziuns e saja ida sur ils cudeschs. Ils giuvens sajan ils trumfs per che la pbd haja in bun avegnir, ha manegià Niggli. La direcziun da la pbd haja prendi conuschientscha da las propostas fatgas da la pbd giuvna co vinavant cun la partida. Ils fatgs sajan vegnids mess sin maisa e quels vul Niggli er preschentar en in

mais a Claustra tar l'emprima radunanza 2020 da la pbd da noss chantun. Ils resultats vegnan suttamess tar la radunanza dals 5 da favrer cun speranza blers commembers, ha menziunà Niggli. Ina maridaglia cun in'autra partida saja la pli pitschna opziun, ha ditg Niggli. Da schliar la pbd grischuna na saja da preschent er nagin tema. Chantunal saja el-

la anc adina la terza ferma fracziun en il parlament grischun e cun avair en sia retscha intgins fermes giuvens restia la pbd ina partida che s'engaschia per soluziuns, per la populaziun, per l'economia, il turissem e l'agricultura, ha accentuà Niggli.

En tuts cas, resignar na saja segir nagin tema.